

Kyā Ham Īsā^(a.s) Ko Pahachaan Paaēnge?

Īnjeel : Luqaas 24:1-53

Hafte ke pahale din subah taḍke, itwaar ko, wo aurateñ qabrgaah par gaeen jahaan Īsā^(a.s) kā jism rakhā huā thā. Wo apne saath kafan-dafan me istemaal hone waalī cheezen taiyaar kar ke laaeen thī.⁽¹⁾ Unhone dekhā ki qabrgaah kā patthar ek taraf paḍā huā hai.⁽²⁾ Un logoñ ne aṇḍar jā kar dekhā lekin unheñ Īsā^(a.s) kā jism naheen milā.⁽³⁾ Jab wo ye soch kar hairat kar raheen theen tabhī achaanak do ādmī chamachamaate hue kapḍe pahne unke paas ā kar khaḍe ho gae.⁽⁴⁾ Wo aurateñ bahut ḍar gaeen aur unhone zameen par sajdā kiyā. Phir un donoñ ne auratoñ se kahā, “Tum ek ziñdā īṇsaan ko yahaan kyuñ ḡhuñḡh rahī ho? Ye jagah murdā logoñ ke liye hai.⁽⁵⁾ Īsā^(a.s) yahaan naheen haiñ. Wo uṭh gae haiñ! Tumko yaad hai unhone Galeel me kyā kahā thā?⁽⁶⁾ Īṇsaan ke beṭe ko shaitaanoñ ke hawaale kiyā jaaegā jo use sulī par chaḍhaaēnge aur wo teesre din ziñdā ho jaaegā.”⁽⁷⁾ Tab un auratoñ ko yaad āyā ki Īsā^(a.s) ne unse kyā kahā thā.⁽⁸⁾

Wo aurateñ wahaan se chalī gaeen aur ye baateñ jā kar un gyaarah shaagirdoñ ko bataaeen aur baaqī maujud sabhī logoñ ko bataaeen.⁽⁹⁾ Auratoñ me Yaaqub kī maañ Maryam, Maryam Magdaleenī, aur Yuhannā bhī maujud theen.⁽¹⁰⁾ Un auratoñ ne sabko wo bataayā jo qabrīstaan ke paas huā thā to shaagirdoñ ko wo sab bakwaas baateñ lageen.⁽¹¹⁾ Lekin janaab Patras qabrīstaan kī taraf dauḍ paḍe. Unhone aṇḍar jhaanḱ kar dekhā to unheñ bas sutī kafan hī nazar āyā jis me Īsā^(a.s) ke jism ko lapetā gayā thā. Janaab Patras wahaan se chale gae aur is soch me paḍ gae ki kyā huā hogā.⁽¹²⁾

Us din Īsā^(a.s) ke maanne waale do log Immaaus naam ke ek shahar kī taraf jā rahe the. Wo gaañw Yerushalam se saat meel kī durī par thā.⁽¹³⁾ Wo donoñ isī baare me baat kar rahe the ki kyā huā thā.⁽¹⁴⁾ Jab wo is baare me baateñ kar rahe the to Īsā^(a.s) unke saath chalne lage.⁽¹⁵⁾ Lekin unkī āñkheñ Īsā^(a.s) ko pahachaan naheen saktī theen kyuñki unkī āñkhoñ kī roshnī par pardā ḍaal diyā gayā thā.⁽¹⁶⁾ Īsā^(a.s) ne unse puchā, “Tum log ye kis cheez ke baare me baateñ kar rahe ho?” Wo donoñ log ye sun kar ruk gae aur unke cheharoñ se afsos jhalak rahā thā.⁽¹⁷⁾ Unmeñ se ek ādmī jiskā naam Kliyupaas thā. Usne kahā, “Shaayad Yerushalam me tum akele ādmī ho jisko ye naheen patā ki wahaan kyā huā hai.”⁽¹⁸⁾

Īsā^(a.s) ne un se puchā, “Tum kis ke baare me baat kar rahe ho?” Unhone jawaab diyā, “Ye Naazreth ke Īsā^(a.s) ke baare me hai. Wo Allaah taa’alā ke nabī the. Unhone Allaah taa’alā ke fazl se uskā kalaam sunaayā aur logoñ ko taaqatwar karishme dikhaae.⁽¹⁹⁾ Hamaare haakimoñ aur waqt ke imaam ne unko maut kī sazā dilwaaī aur sulī par chaḍhā kar qatl kar diyā.⁽²⁰⁾ Ham log un se ye ummeed kar rahe the ki wo Israaeel ko bachā leñge aur Yahudī logoñ ko [Romī saltanat se] āzaad karaaēnge. Āj is baat ko hue teesrā din hai.⁽²¹⁾ Aur hamaarī kuch auratoñ ne āj hameñ ek chauñkaane waalī baat bataaī. Āj wo log qabrīstaan gaeen theen,⁽²²⁾ lekin wahaan unko murdā jism naheen dikhā aur unhone bataayā ki do farishte zaahir hue aur unse kahā ki Īsā^(a.s) ziñdā haiñ!⁽²³⁾ To ham me se kuch log qabrīstaan gae, lekin un logoñ ko bhī wahaan Īsā^(a.s) kā jism naheen milā.”⁽²⁴⁾

Tab Īsā^(a.s) ne unse kahā, “E bewaquf logoñ! Tum log nabiyōñ kī kahī huī baat par īmaan laane me itnī sustī kyuñ karte ho.”⁽²⁵⁾ Maseehā izzat ke muqaam par pahuñchne se pahale in sab museebatoñ ko sahegā.⁽²⁶⁾ Tab Īsā^(a.s) ne un logoñ ko Musā^(a.s) aur baaqī nabiyōñ kī baatoñ ko bataayā. Unhone unko saḡi tarah se samjhaayā ki muqaddas kitaaboñ me kyā likhā hai.⁽²⁷⁾ Wo log Immaaus naam ke qasbe me pahuñche to Īsā^(a.s) aur āge jaane lage.⁽²⁸⁾ Tab unhone Īsā^(a.s) se guzaarish karī, “Hamaare paas rukie. Bahut der ho gaī hai; aur raat hone waalī hai.” To Īsā^(a.s) unke saath ruk gae.⁽²⁹⁾ Īsā^(a.s) unke saath khaanā khaane baiṭh gae. Unhone haath me roṭiyaan le kar duā maañgī aur phir roṭī ko toḍ kar un me baañṭ dī.⁽³⁰⁾ Tab achaanak un donoñ kī āñkheñ khul gaeen aur wo log Īsā^(a.s) ko pahachaan gae. Lekin jaise hī un logoñ ne unko pahachaanā wo wahaan se ḡaayab ho chuke the.⁽³¹⁾ Un donoñ ne ek dusre se kahā, “Jab Īsā^(a.s) hamse baat kar rahe the aur muqaddas kitaaboñ kā saḡi matlab samjhā rahe the to aisā lag rahā thā ki jaise hamaare aṇḍar āg jal rahī ho.”⁽³²⁾

To wo shaagird wahaan se jaldī se uṭhe aur Yerushalam waapas chale gae. Wo log wahaan pahuñche jahaan unhone gyaarah shaagirdoñ aur unke ās-paas jamā bheed ko dekhā.⁽³³⁾ Wo log kah rahe the, “Maulā dobaarā ziñdā ho gae haiñ! Unhone apne āpko janaab Patras ke saamne zaahir kiyā.”⁽³⁴⁾ Tab un donoñ logoñ ne sabko wo sab bataayā jo unke saath raaste me huā thā. Unhone kahā, “Ham to Īsā^(a.s) ko tab pahachaan gae jab unhone hameñ roṭī baañṭī.”⁽³⁵⁾

Jab wo donoñ ādmī ye sab batā rahe the, Īsā^(a.s) bhī un logoñ kī bheed me maujud the. Īsā^(a.s) ne un logoñ ko duā dī, “Tumheñ sukun haasil ho.”⁽³⁶⁾ Wo sab log unheñ dekh kar ḍar gae. Unko lagā ki wo bhut dekh rahe haiñ.⁽³⁷⁾

Īsā^(a.s) ne unse kahā, “Tum log ɢare hue kyuñ ho? Tum log us cheez par kyuñ shak karte ho jise tum dekh sakte ho?”⁽³⁸⁾ Mere haath aur paioñ ko dekho. Ye main hī huñ! Mujhe ɢu kar dekho. Tum dekh sakte ho ki mere paas ek zindā jism hai; bhutoñ ke jism naheen hotā.”⁽³⁹⁾

Ye sab kahne ke baad Īsā^(a.s) ne logoñ ko apne haath aur pair dikhaae.⁽⁴⁰⁾ Unko maanne waale log hairat me the aur bahut ɳhush bhī. Unko abhī bhī is baat par yaqeen naheen ho rahā thā. Īsā^(a.s) ne unse kahā, “Kyā tumhaare paas kuch khaane ke liye hai?”⁽⁴¹⁾ Logoñ ne unheñ pakī huī machlī dī.⁽⁴²⁾ Īsā^(a.s) jab khaanā khā rahe the to unke shaagird unheñ bahut ɢaur se dekh rahe the.⁽⁴³⁾

Unhone logoñ se kahā, “Tum logoñ ko yaad hai jab main tumhaare saath pahale thā? Maine kahā thā ki jo kuch bhī mere baare me likhā huā hai wo ho kar rahegā, jo Musā^(a.s) ke qaanun aur nabiyōñ kī kitaaboñ me hai.”⁽⁴⁴⁾

Tab Īsā^(a.s) ne unke zahanōñ ko khol diyā taaki wo log muqaddas kitaaboñ ko samajh sakeñ.⁽⁴⁵⁾ Unhone sabse kahā, “Ye likhā huā thā ki Maseehā ko qatl kar diyā jaaegā aur wo teesre din zindā hogā.”⁽⁴⁶⁾ Aur ye likhā huā hai ki Maseehā ke zariye log apne gunaahoñ se taubā karenge aur maafī haasil karenge jiskī shuruaat Yerushalam se hogī.⁽⁴⁷⁾ Tum in sab baatoñ ke gawaah hoge.⁽⁴⁸⁾ Suno! Main tumheñ wo bhejuñgā jiskā waadā Allaah rabbul kareem ne tumse kiyā hai. Lekin tab tak tum log Yerushalam me hī rahnā jab tak tumko wo taaqat mil naheen jaatī.”⁽⁴⁹⁾ Īsā^(a.s) apne chaahne waaloñ ke saath Baitaaniyaah tak gae aur apne haathoñ ko uṭhā kar unheñ duā dī.⁽⁵⁰⁾ Wo unse alag ho gae aur jannat me uṭhā liye gae.⁽⁵¹⁾ Un sab logoñ ne taazeem me apnā sar jhukaayā aur ɳhushī-ɳhushī apne shahar waapas chale gae.⁽⁵²⁾ Wo log ibaadatgaah me hī ruke aur Allaah taa’alā kī ibaadat me lag gae.⁽⁵³⁾